

T5236.05/4462

13

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 20 1940

文書英華卷之四

命德

述聖賦一首

高祖受命述聖賦一首

述聖賦 太宗御製序

朕以二九之奇為天下表亂毒流區夏禍過必集維則

靈變云興征將則風聖靈合年二十有四曠概承之電公

中元震湯三用撥清八表及至壯年獲臨軒位然其

靈將出圖制之致使制有進善之臣野無行歌之士

益於私室誠於公門一尉候於東西泥車青於南

山走他鄉飲山放醴放牛歸而意想元方欲使石

文苑英華卷第四十一

賦四十一

帝德一

述聖賦一首

進高祖受命造唐賦表一首

高祖受命造唐賦一首

述聖賦

太宗御製序

朕以二九之年屬天下喪亂毒流區夏禍遍郊畿群雄則
 盜駭雲興猛將則風驅霧合年二十有四慷慨京邑電發
 中元震蕩三川掃清八荒及至壯年獲臨寶位然乃遠夷
 委質萬國歸心致使朝有進善之臣野無行歌之士節義
 盈於私室獄訟息於公門一尉候於東西混車書於南北
 由是偃組練而敷禮樂放牛馬而逸黎元方欲紀石封山

哈佛大學哈佛葉宗
 圖書館珍藏

握河沉璧

見文選曲水詩序

功既成矣世既貞矣信可以優游暇

豫作樂崇德者歟故因茲餘隙乃脩苑囿其勝地則有積
翠凝碧其川阜則有濯龍平樂若乃南面雙闕北對芒山
引洛浦之通波連邠廓之餘趾藂薄本麗加之以芳節池
沼素美瑩之以初陽舞蝶遊絲帶清飈而散影分花交柳
映碧浪而成文巨樹千尋結輕烟而聳翠危峰萬仞照落
景而開紅雲氣縈巖似遊仙於巫峽霓光染溜類濯錦於
成都戲羽間關互飛沉於蒙密遊鱗澆澗乍出沒於荷芰
翔泳之美盡斯仁智之樂備矣可以遁形匿跡可以養志
恬神獨往襄城之中斯可觀也藐然姑射之上何以加茲
余每覽巢許之儔松喬之匹未嘗不慨然慕之思可以脫

獲長辭拂衣高謝欵復以時運見羈因留連於大任徒有
輕舉之志而不達者其天意也豈人事乎

臣聞立極著紀之初闢乾開歷之始上所以分垂象懼下
所以疆括地里惟大人之有作越百代而孤峙飛五位以
龍奮騰九萬而鵬起曩者炎運將終鼎命去絕曰溟波駭
八維幅裂羽檄交馳邊鋒並執長星夜掃車雲朝結莫不
望壁壘以靡旗對轅門而亂轍故得百城冰潰千里煙滅
固靈命之有在乃慷慨而投袂驅八駿以雷擊馭六飛而
電逝騰星劍以外倚振雲鋒而高聳既後事而先謀亦先
勝而後制兵有臨而必剋功無往而不濟龜策叶以符兆
人神應而合契諒包項以駕軒寔孕皇而育帝足以光燭

千祀足以祚隆萬世於是戢兵偃武銘功紀勳採三代之
逸經刊八方之遺籍搜隱遁於林藪訪栖遲於巖石然後
調玉律以定時測金儀而考曆符洛下之前驗嗣容成之
絕迹若夫流惠澤於瀛表被仁風於區外窮八際以來庭
踰九譯而浹會莫不削衽而崇禮樂解辯而襲冠帶參兩
曜以齊明泚二儀以稱大信一人之致感寔萬方之攸賴
聖皇以令叶先甲時惟仲春乃整法駕馭華輪六軍雷動
萬乘星陳臨濁河以北睠指清洛而東巡乃升雲闕俯天
津朝萬國禮百神瓊費咸集要荒畢臻夫其地也據三川
以設險憑四闕而作固總奔湊於八方測圭影於中度既
定鼎於周業亦克昌於漢祚望嵩巒之邈迤臨峭坂之迴

互所以仰叶辰象所以俯清天步若夫削靈巖以表闕疏
清派而爲池極皇居之壯麗窮大厦之宏規抗脩廊之窈
窕屬輦道而逶迤夕霞臨而錯落晨光照而陸離至如雲
觀晨開風亭夜敞迴長飈於輕翼凝濃露於仙掌沉落月
於壁臺挂奔星於珠網羅紈飄而散馥環珮動而流響垂
密葉於綺窓散飛花於翠幌復有天池濛沼以嬉以遊鼓
輕柁漾仙舟蔭喬木鏡清流魚鳥陵亂蘋藻沉浮控飛梁
以架迴列層閣以環洲漬檀欒之脩竹映迢遞之危樓風
未生而葉動景將昃而光收若夫瑞草竒色祥樹嘉名霏
紅曜紫垂緗拖青或玲瓏於玉砌或點綴於金楹交九衢
而結影分四照以開榮浥朝露而逾馥帶星風而更輕於

是登崇觀以周覽闢層軒而遐矚樹含嶺而共青草帶原
而同綠俯八絃而非遠願千里而爲局飛霞歛而復舒輕
煙斷而還續既神王以情暢乃遣累而思足聆群籟之晨
響想鳳簫之夜聲窺襲雲之朝散思鶴蓋之後清掄大位
而不寶脫萬乘而爲輕訪真人於姑射問至理於廣成志
耿耿以遐顧心遙遙而上征踐太微之崇閣闢閭闔之天
宥拖紅旗於絳闕翼芝蓋於紫庭咀靈一作氣而還壽吸
玄液以駐齡若夫北瞰太行南臨少室積峰遠而愈翠重
嚴隱而復出乍鬱律以干霄又岌堯而槩日松翳空而難
辨鳥翔高而易失屬天下之無事聊逍遙以自逸方欲登
日觀以縱金覽雲亭而竚蹕於是凝聖情以遠慮思成敗

於終古美揖讓於有虞壯成功於大禹耻用兵於中冀鄙
窮戰於丹浦每有違於汝弼恒知失而思補乃命促苑囿
散積聚改制度易規矩削侈麗於樓臺崇質素於階宇仁
好生而必遂德無貫而不輔習嘉禮於玉帛和大樂於鍾
鼓上可以降集群瑞下可以安懷率土惟聖作之可觀寔
萬物而斯覩顧微臣之庸朽濫叨選於詞林恒戒盈以獻
賦每規過而進箴幸天地之熏載欣日月之照臨豈窺天
而識象寧測海而知深徒望雲以考澤空就日而傾心漸
九臯而戢翰望天路以揚音美皇運之方永嗟頽齡之遽
侵顧鴻恩之未答徒頌德以長吟

進高祖受命造唐賦表

顧况

臣况言臣聞上古滅跡以恢至道其次立名以扶大化臣山谷之人頃爲韓滉參謀滉性嫉惡臣性孤直滉仙朝露臣復故山陛下拔臣臣况口噤汗出不敢論天下事然自開元天寶已來耳目所接精經茂德略有百人不露一命非不欲出無益所以不出豈大國無人而黨與之徒未詳菽麥驟居清貫此由權臣上負明主下負蒼生中遏賢路耳是非邪正勢不兩立唐有天下賦歛甚薄刑罰甚寬神人保和鳥獸咸若然而時有反側逋逃之誅得無因乎惟天啓聖無有一物不得其所書曰遠人不服來以文德德猶土也廣厚載物文猶火也光明麗天尅金之象生土之義蓋聞朝出群龍多士如海出夜光明月所以別好惡而

扇華夷未有影不從表聲不從聽聖德惟新頌聲不作臣下之闕也謹進高祖受命造唐賦一篇論皇家大慶歷祚延久悅若光靈促臣上獻伏惟陛下赫赫巍巍與天同功鳳凰巢于阿閣麒麟乳于郊藪臣之願也無任冰谷之悒謹奉表以聞臣况誠惶頓首頓首謹言

此下一有知出二字

高祖受命造唐賦

并序

前人

隋文帝滅陳盪定海內煬昏多罪墜失先業身滅國替勿恭以神人非聖莫可乃命太保蕭造奉皇帝璽綬歸我高祖高祖固讓謠歌欲訟已歸唐矣而薛舉王充竇建德等陳勝唱禍爲漢作階夫鹿臺之積非無財也間左之戍非無卒也湯以七十里文王以百里而臣諸侯非有土也隋

地徧天下二帝之業一朝掃盡可不謂大悲乎吳公子札古之達天命者其歌唐思深哉其有陶唐氏之遺風乎氣蒸芒碭龍躍太原天命也昔司馬相如賦子虛諸侯之事非天子之事漢武聞之猶曰朕獨不得與此人同時班固張衡左太冲所賦兩京三都各務誇大而王者受命則闕而不書蓋賦者古詩之流古者探詩言之無罪今王澤不竭斯文未喪翰墨間作其誰曰不然先王建國始以文經上行下效終以武定疆本弱枝四方翕然無凶人矣故明德慎罰文王所以造周也應天順人武王所以克商也書云帝堯聰明文思帝舜濬哲文明斷自唐虞洎乎周漢帝王美稱以文爲首我唐文德宜在三代之上微臣賦頌耻

居數子之下初論啗氏顛覆次論皇家開統末論告厥成功簡于上帝鋪乎下土播乎無窮固非常才淺慮之所能及意者實以祖宗光靈引耀鼓動之所致也其辭曰在桓靈之道暄兮本小而末大下陵而上替君臣相失南北歷帝天醜隋而命唐纂周漢之鴻裔大哉文王王季其父武王其子父作子述叶天命以應期煬爲不道庶官携貳魚爛土崩荒沉所致雖曰匹夫之勇

一作雖匹夫之勇兮

有盜中原之

意凶貫既盈果不保於神器江都之禍酷甚望夷之事亡國之君雖綿古而必類王者父天母地非所以苟其身而貪厥位豈有男女疾痛而父母不爲之歔歔乎此真主所以乘時而建義也會不一戰而得行其志湯武應天也其

實誓師高祖受禪也其實揖讓猶感恩以慟哭乃立代而
尊煬仗順而升蓋前經之所曠承土德以播業兮與炎靈
而更生維李其根降居真源洎武昭之隴胃揚太祖之周
勲典則明融是將貽乎子孫高皇生而豁達大度徇齊弱
而能言神光佳氣兮爛以氛氲中疑白雀兮戴紫雲隱隱
瞳瞳兮始乎太原君子得時有如追奔岷峨遵江兮河出
崑崙雷砰一作電掣浩浩渾渾厥波雖雄爲所海吞乾健
而坤順兮利配乾而法坤有何姦豪恃險偷存乃建皇極
鍾乎歷數革舊鼎新兮式間封墓走百神以咸秩兮包五
岳而作固過蒲津而川后增流兮次霍邑而山靈告路彼
上慘黷兮我寬刑以薄賦陋茅屋乎土階遵朱干與大輅

乃有嚴更之署環衛鈞陳文昌武庫玉冊韜府兮內八景

之真文金盤粲一作槩

霞兮承九天之清露元聖有作恢法

慶也厥祖草昧諸夏宗臣蠻夷酋長從德如歸若王固讓
而天下可違乎有社稷焉不可闕祀有蒸人焉不可無主
是以木曰威仰火曰燁怒辰戌丑未王我唐土天實若曰
四海橫波虔劉札瘥若王盤桓柰天下何義寧二年五月
甲子高祖即位木宮曰甲水宮曰子支干相生成字爲李
雖子卯不舉而以是爲戒此臣子所以服泰階也神祇叶
從龜筮攸同乃更正欵以刀文爲開通告于上下予昧乃
德嘉乃丕績若將殞于厥躬草艾渠魁兮罔駕英雄拔萬
姓於湯火兮散三光於昊窮北皇王所以職教化也非天

下衍不應非聖不作造我鉅唐在夏之興弼成九服經啓
九道荒厥迹之茫茫在周之興西至流沙東至樂浪重九
譯乎越裳在漢之盛大夏身毒月支夜郎辰韓之國盡疑
華傍行未若我唐歌其聲舞其容十有二部鏡一作立乎
中央唐既有土德樂亦有臣妾易曰殷薦上帝又曰行地
無疆提封所經聲教所被窮天下之琛怪截海外之梯航
逾蟠桃而跨弱水兮蓋四十萬里鳥飛驥馱兮鱗萃乎舩
艎不以三代爲境土七雄爲富疆乎何則漢高提劔學校
興於文景周武載戈頌聲作於成康卜代三十延祚四百
亦謂之享國久長與夫青牛糾幘白馬朱鬃報千祀於元
君兮呼萬年於太行林邑貢能言之鳥大宛奉汗血之馬

孰與四白鹿四白狼乎擒建德於武庫兮格魏公於教倉
耕有三十年之畜以備凶荒戰有百萬衆之師以讐戎羌
胡驕則馬銜塞草寇虐則龍決天潢又孰與周漢之廣建
康莊在歲九天之下九地之上兮合二九爲一方凝碧樹
於洞房送白雲於帝鄉舞破陣於清廟兮準文始與西廂
迎氣於東郊兮養老於上庠禘祫之禮鉅鬯圭瓚兮辟雍
明堂襲蛟鑪之馥馥壘鼉鼓之鏜鏜羽林孤兒青衿胄子
森琳瑯以鏘鏘河山巨防百二盤岡渭水貫都兮來天漢
之湯湯泥龍宮而梢鬼國延苑囿而峻墉隍驅一作馳駒
駮犀象乘黃附翼之馬骨騰肉飛滅沒陸梁鷲出女床鸛
鷄白鷗孔翠翔一作翔縮沙磧與江湘休徵四塞兮花萼

連芳大容揮絃兮子晉吹箏飛廉馳道兮河鼓服箱雍門
韓娥流徵叩商徹歌鍾於未央校羽獵於長揚升平既久
兵設不防虜自燕垂陷乎洛陽雲霄邁難金火耀芒上帝
之哀下人兮生魂魄而起稟育楚詞曰帝命巫陽有肅宗
龍飛日出鳳翔兮四誅犬羊代宗赫怒兮草被嚴霜復九
廟之郊裡三辰忽乎曄煌扶已撓之厚棟細既絕之頽綱
然一胡作亂四海犇亡父習乎勇母抱其子乘城看戰電
掃八荒天下大定朝廷無事帝端拱于穆清呀溟渤以為
池兮拓宇宙以為城務子來之經營乃有棟宇之盛砥珠
礪破刻桶雕楹甲乙於方中兮勢夭矯而上征東西兩京
岳立雲峙宮室相望八百餘里雖千數萬名猶未盡也翼

翼峨峨重關四塞抵昆明而瞰太液象蓬壺之廣大踐太
華而節終南抱周秦之襟帶於是偃師偶人郢匠朽壤之
輩工發藻繪情生眇睐式瞻魄駭爰處體怵乃有輿服之
飾鏤轂錯衡霓旌羽蓋紋牕綉戶宵玲瓏以相對明月夜
光煥合影乎其內青琴素女間木難選詩珊瑚間木難注
色珠也木作闌恐碧誤之首飾響結綠之腰珮嗟神人之叶和感雨露之霏霏
職貢隘入舟車溢載馮夷一作冰夷蓋馮夷別名陽侯既降於英靈
木魅山鬼不勞乎祈賽于時太府太倉粟腐繒敗荔枝橘
抽魚鹽惟錯之蓊隘幽明黜陟輕重約法之殿寂重二百
年天下九百餘萬戶六千三百萬口僇輕斂寡國富家肥
砢礪岌岌碾碾礧礧兮沸渭駁杏訇訇噦噦兮亘地蓋天

來朝會兮天子於是乎班瑞等威卑其君長降為牧守宸
衿恢張以天地之無外一萬二千年為一紀三萬六千年
為一代古者登太山七十二君兩漢踵武亭亭雲雲八百
餘年寂寥無聞我唐傳祚已來革隋一封岱二克復三除
克四五將發三門備南正司天北正司地勾測影於北至
建相風於南事太微太一金版玉笥逮夫淹中闕里之類
蓋三十萬卷領古今之文字振古以來未之有也其事始
於武德成於貞觀興乎一作開元天寶之間唐虞夏殷之
世不足多也然則天子四海為家六合為都方明參乘昌
寓為御三載考績五載一巡狩觀萬國之有無禹會會稽
舜遊蒼梧曰俟予后后來其蘇天子於是命有司興農圃
墾土木放女謁斥讒夫臣拜手稽首載陳厥謨康哉良哉
耻其君不及唐虞

文苑英華卷第四十一

文苑英華卷第四十二

賦四十二

帝德二

偃伯靈臺賦一首

堯見姑射神人賦一首

闕四門賦一首

鑄劍戟為農器賦一首

漢宣帝冠帶單于賦一首

漢文帝罷露臺賦一首

耀德不觀兵賦一首

漢高祖斬白蛇賦一首

文王葬枯骨賦一首

偃伯靈臺賦 并序

以泰時和伯義悠為韻

褚寔

偃伯師節也國家武成止戈文致皇極小宗伯樂之廣有

命賦 國家執道紀酌天和敷皇極以協德作武成而止

戈由是天子居穆清之中念康濟之策乃訊元老禮鴻碩

恢至道以垂裕義靈臺以偃伯且以韜五兵屏三革服仁
義以爲壁壘仗道德以爲矛戟俾其庶績咸熙百工惟時
弓矢載橐詎資乎司馬之法仁義無敵寧取乎丈人之師
矧乎豐財保大之謂仁濟物安時之謂義義也者所以溥
洪暢之德仁也者所以廣生成之施我是以却馬於糞車
務仁於穡地然後頌大武歌由庚協神道以廣運致人文
以化成以左右萬物以後利群生則夫乾元貞坤元亨彝
倫敘而太階平豈不以其遠至邇安有截無外却兩階之
干羽頌五戎以冠帶百神胙饗以屬福二氣氤氳以交泰
亦以播無疆之休昭有道之大固能協乎上下承以天休
俎豆陳而五刑措干戈戢而七德修展威儀之秩秩卷旌
旆以悠悠始欲登三以咸五豈徒歸馬而休牛尚矣哉茂
祉之彰玄德之厚真神明之所福宜配天地而長久偃師
節於靈臺之上返淳風於混元之首諒遊聖而難知徒扣
虛而責有

堯見姑射神人賦

以聖德之崇有
然欽道爲韻

王起

帝堯以化成於萬國歌宣於九德出汾水之陽經姑射之
側峯巒交映若覩神人之形冰雪相鮮皆呈處子之色若
非感而遂應靈而不測何以見不死之庭當至人之域始
其厭宮室出茅茨駕鸞輅建羽旗若光若滅乍合乍離寓
目於巉巖之頂駐蹕於沮洳之湄爰按節而至矣乃傾蓋
而望之倏而五雲繚繞群仙縹緲出碧嶺之崇崇臨丹兵

之宵宵瞻童顏之麗綽約則多觀羽服之鮮穢禪非少集
其侶乍謂崑崙之巔狀其居不異蓬萊之表由是職山岳

吳都賦山岳之崑 矚天潯既玄覽而旨遠亦高蹈而思深乃曰我

以萬姓臣服八荒君臨蓋天下之至貴亦域中之所欽安
知阻茲崖巘隔彼岑崱有吸風之人遐不可見仰乘雲之

客高不可尋既而儼珠旒端玉藻增肅穆之敬念希夷之
道見仙人之岳岳徒仰高山望鸞鶴之翩翩且輕大寶既

而求之不得瞻之在前念四子而莫來莫往思一人而無
黨無偏乘白雲而何及引黃屋而來旋故能戒於無怠防

於未然向使忘鶉居之性徇龍駕之盛則光宅之德徒聞
乎以遨以遊比屋之封詎見乎乃神乃聖我皇明四目達

四聰惟神也愛而見惟聖也感其一作而通不窺仙於飲露

不問道於順風則姑射之神未為盡善陶唐之主未足比
崇

闕四門賦

以來遠人致多士為韻

王起

王者居上國來遠人闕四門而不壅俾八方而是遵朝聘

會同自達於遐邇華夷蠻貊不間於君臣所以表王道之
蕩蕩彰皇化之淳淳我皇闕四門也廣天視廓天意總寰

海而有截端冕旒而無事猶懼遺淹滯拔秀異或玄纁而
旁採或弓旌而遠致觀乎天步有四達之清夷仰彼帝闈

無九重之奧祕所以遠方知歸羣才不匱彼前代之有四
門也或化未洽志未恢水陸之珍是湊丘園之士莫來雖

大道甚夷不異乎遐阻雖高門有闕而同夫不開今我后
則不然下土順而風趨王化行而草偃闐闐所湊表聖心
之禮賢巖藪皆空知帝德之柔遠士嚮方而集才應時而
多鴻鸞接翼而畢萃驥駉齊足而咸過莫不趨斯門之呀
豁知我化之休和休和之始聖皇之祉致穆穆於四門獲
濟濟之多士關鍵不用無老氏善閉之功車書大同叶王
者無外之美至矣哉舜德巍巍復存乎聖理

鑄劔戟為農器賦

以天下無事務
農息兵為韻

裴度

皇帝嗣位之十三載寰海鏡清方隅砥平驅域中盡歸力
穡示天下不復用兵於是銷鋒鏑而倣載南畝痔錢鑄而
平秩西成所以殄凶器降嘉生收禍亂之根本致兆庶之

豐盈者也既而清天步虛武庫劔鏑銷戟鏘露嘗

疑作嘗
或作常

時出匣揮獷俗以來賓今日在鎔唯良工之所鑄長鍛倏
爾而從革覃耜忽焉而中度廢六月之遄征興三時之盛
務觀乎聚而改煎欬飛燄而涌煙從而再造將分地而用
天宜人之歌允符於假樂多稼之頌式合於大田若夫弓
戈橐戢於寧歲牛馬放歸於豐年徒虛語耳胡可比焉則
知先利其器欲善其事俾汙萊之盡闢由兵革之不試洪
鑪既鍛失似雪之鋒鏘綠野載耕佇如雲之苗穰昔用之
而有所雖弭之而不棄矧國家以教令為車徒故器械可
得而無以道義為封域故戰爭可得而息由是執帝堯之
允恭復后稷之訓農理化資於地力福祥致於天宗此乃

慶自一人風行九野建中於上返本於下下臣系而稱曰
秦金狄兮未仁周無射兮非雅豈若我后之重穀盡濟羣
生於良治

漢宣帝冠帶單于賦

以威懷禮加北戎遂定為韻

裴度

昔漢宣帝休明允塞烜中葉之英聲示遠人以文德既而
幸甘泉以居正朝呼韓於北錫之綬冕俾之藩翊位居
侯王之上侍在軒墀之側服之孔備垂懸綬之腰章髮則
有餘映切雲之若日飾且會朝之次昭明孔融雖加之以禮
寔誘之以衷厥_切既殊荷榮華之寵命其儀未習惜衣服
之在躬此實可以閱帝聰播皇風亦何必貺玉帛之資空
成耗國錫金石之樂用表和戎夫爵以賞功服以旌禮懿

爾容之中順故我命之光啓矧乃來茲鳳闕踰彼龍沙知
漢德之全盛厭胡俗之幽遐齊縞帶於周行獨明向化異
玄冕於醜類豈曰亂華錫之不聞於屢褫崇之豈俟夫三
加想夫解辯懷恩動容思媚乍重譯而獻款或稽顙而奉
贄使羣方之闔樂由一人之錫遂鏘之玉佩顧韋鞞而多
慙頽以金貂與麗服而自異是使孔熾之類率服而莫違
悍戾之屬束帶而共歸知子之來贈同雜珮彰君之化德
乃垂衣殊沐猴而可作方戴鷩而有威今我后散皇明而
馳聖聽致戎夏之克定勤厲理而明弼諧故蠻夷之允懷
尚冠帶於萬里舞干羽於兩階彼長纓之與五餌何斯道
之孔垂

漢文帝罷露臺賦

以百金休功萬國從化為韻

李程

偉漢文之君臨惟宮室有度以兆庶為心安不忘危豈勞力於累上用過乎儉亦軫慮於百金懼乎設怨將以激勸若臺之是修唯德之不建是故絕役心於製造弘儉德於億萬乃言曰臺者高峙路者四通不足避燥濕寒暑無以受朝聘會同奚必高居為明四目遠聽為達四聰不重劔何以就役不勞力何以成功由是却匠人之計全王者之德豈畜於財實肥於國雖百工麤疑作糜至無所作則庶人子來曷由陳力言之既終人故適從板築之功既絕尋尺之材勿庸柱礎不施寧轉它山之石棟宇罷構匪斷狙狽之松若夫氣候為備順時布化諒惟國之有恒成茲臺之柯暇南至以望太史每升其觀臺仲夏而居有司自設其高榭亦何用土木特建丹雘勤修誠無用之作非不朽之謀豈止全十家之中產貽百代之良籌彼晉靈登臨我則絕彈人之戲宋平興作我則無築者之謳式昭莫大之見用保無疆之休不然何以紹祉祖宗垂芳簡冊踰儉約於三五延載祀於二百豈不以肇於露臺播無為之嘉畫

耀德不觀兵賦

以明德尚道懷仁畏威為韻

張隨

惟先王享國建用皇極制五服而有序御四夷而在德近不貢必先威讓之辭遠不庭則修文物之則所以止干戈而重仁義遏寇虐而茂生植夫潔其流者在於源清成其外者在於內平以德則天下順以力則天下爭故有武不

黷有兵不征穆王之功何補謀父之言可明將其修己以
推畔曷若殺人以盈城於戲至理之時惟德是貴柔其遠
而不襲阜其財而不費以道義爲干櫓以禮樂爲經緯是
以文足昭武可畏借如舜帝在上苗人不懷雖藏事於伯
禹終舞干於兩階然後七旬來格庶績允諧周文旣興崇
國不道用戡時難以奉天討矧勅敵而未悛爰因壘而自
保然後再駕云服四方大造蓋由德所賓信所親豈無五
兵且懼於暴物况有七德實在乎安人人勞所以損元氣
物傷所以惻至仁迺凶器攸興聖人匪尚車書旣其混一
牛馬於焉休放兵不戢如火自焚德不修於君曷相所謂
圖之大慎之微觀兵何是耀德何非素翟南來而越裳重

譯白狼西入而荒服來歸夫欲朝萬國歸四海不可以逞
弧矢之威

漢高祖斬白蛇賦

以漢高皇帝親斬長蛇爲韻

白居易

漢高帝將戡時難撥禍亂乃耀聖武奮英斷提神劔於手
中斬靈蛇於澤畔何精誠之潛發信天地之幽贊卒能滅
強楚降暴秦創王業於炎漢于時瓜剖區宇蠡起英豪以
堅甲利兵相視以壯圖銳氣相高皆欲定四海之洶洶救
萬姓之嗷嗷帝旣心窺咸陽氣王芒碭率卒晨發一作縱
徒夜亡有大蛇兮出山穴亘路旁疑白虹之精彩備素一作
白龍之文章鱗甲皚一作晶一作以雪色睛眸翹而一作電光聳
其身形蜿蜿而莫犯舉其首勢矯矯而糜亢勇士聞之而

挫銳壯士觀

一作觀

之而推剛於是行

一作從

者告於高皇高

皇乃奮布衣挺干將攘臂直進瞋目高驤一呼而猛氣咆

哮再叱而雄姿抑揚觀其將斬未斬之際蛇方

一有欲字

縱毒

螫肆猛噬我則審其計度其勢口噪雷霆手操鋒銳凜龍

顏而色作振虎威而聲厲

一有何字

天之啓神之契舉刃一揮

溘然而斃不知我者謂我斬白蛇知我者謂我斬白帝於

是灑兩血推霜鱗塗野草濺路塵嗟乎神化將窮不能保

其命首尾雖在不能衛其身盛矣哉聖人之草昧經綸應

乎天而順乎人制勅敵必示以乃武乃神殄災沴不可以

弗躬弗親

一作躬不親

原夫

一作若夫

龍泉黯黯秋水湛湛苟非斯

劍蛇不可斬天威煌煌神武洸洸苟非我王蛇不可當是

知人在威不在衆我王也萬夫之防器在利不在大斯劍

也三尺之長于以懾萬物于以駭八方歷數旣終聞素靈

之夜哭嗜欲將至知赤帝之道昌繇是氣吞豪傑威振幽

遐素車降而三秦歸德朱旗建而六合爲家彼

一有殊字

鯨鯢

截犀兕未若提青蛇而斬白蛇

凡一作皆集本

文王葬枯骨賦

以德及枯骨天下歸心爲韻

白行簡

骨雖無知塋以表德展厚禮於九原示深仁於萬國惠加

於鬼則遊岱之魂有依義感於人故歸周之心不忒原夫

靈臺肇建璧池是穿宛彼枯骨委茲窮泉旣靡覩其銘誌

曾莫知夫歲年西伯乃色變盡爾涕流泫然爰命從者將

收瘞焉俾夫惻隱之心因形骸而下至于地升聞之德隨

精魄而上動于天徒觀其年代超忽英靈淪沒土變豐肌
苔封朽骨於是惠霑生死澤及榮枯遺奠有加於蘋藻備
物無闕於芻塗幽壤始開見佳城於白日靈丘是啓旋卜
宅於青烏旣而遷彼古塋塋之中野推誠於重泉之內昭
德於普天之下念此窮塵之骨尚或堊之欲使行路之人
不得見也且夫聖人哀死君子表微用之於國而上下忻
戴書之於史而載籍光輝諸侯感而思服百姓從而知歸
以之理人而人自化以之奉天而天不違故能掩骼教行
送終義立澤靡不浸仁無不及恩加師旅而同德數千慶
延子孫而卜代三十且封比干之墓惟德是欽護信陵之
塚其仁未深曷若我罔辨名氏莫知古今招亡散之寃復
于棺槨收無主之骨歛以衣衾蓋所以感鬼神而動天地
豈止夫三分天下而二者歸心

文苑英華卷第四十二

文苑英華卷第四十三

賦四十三

帝德三

君臣同德賦一首

垂衣治天下賦一首

信及豚魚賦一首

王言如絲賦一首

舜有羶行賦一首

舜歌南風賦一首

禹拜昌言賦一首

木從繩賦二首

王者父事天兄事日賦一首

君臣同德賦

曰若稽古巨唐累聖重光盛烈貫於千古英聲超於百王
爾乃羣瑞呈祥衆靈叶慶神降休祉天垂寶命鳳錄於是
荐臻龜書以之疊映萬姓忻東戶之日一人奏南風之詠

至矣哉微無德而稱焉臣聞非常之主必有非常之臣是以元凱升而唐德茂稷尚用而虞化淳武丁夢徵兮求版築之士文王卜兆兮得垂釣之賓豈直星精之誕方朔維嶽之降甫申故能殷周歎其多士皇漢歌其得人亦有六合稱齊三分號蜀猶傳善政尚留芳躅方鴻翼以濟時比魚水而敦俗誠小國之邊鄙亦順時而自足豈若我聖明之有天下也惣六合以爲家籠八荒而建國旣垂拱而敷化諒偃兵而興德爲百代之規模立萬邦之軌則於是大君端冕而多暇羣臣奉職而有方巍巍蕩蕩濟濟鏘鏘咸有一德視人如傷夔龍在位鷓鷯成行君臣同德而均美聖母臨人而永昌豈徒超五臣而逾十亂固將六五帝而

凶三皇小臣微淺才智踈越濫吹紫庭獻賦絳闕敢同輿頌竊爲歌曰元良明哉股肱良哉盛德至矣大業廣矣我一人兮化無窮臨萬國兮道旣融同心同德君聖臣忠子子孫孫永代克隆

垂衣治天下賦

以聖理無爲道光前古爲韻

天睠唐帝恭承永命守無事爲至德彰不言爲大令當宁而百蠻自賓垂衣而八極居正當書執以混合系祖宗而作聖治契無外人羞有爲戴北極以定位比南山而一作

不移皇皇焉儼六服以御寓燭燭焉虛四聰而聽卑備其文火龍迴帶以如動裁乎用天地成功而不知與區夏再造俾古今同道靜以虛襟固其大寶儲精而雲鬢冠蓋恭

已而耀生黼藻故能追軒皇躡陶唐文物周衛邦家有光
颯祥雲乎五彩蟠瑞氣於六章豈徒具飾乎領袖亦以權
量乎圓方是知垂拱者古之難委裘者聖之旨蓋與神合
寧將智使不然何以酌天心安地紀一家之大無煩車馬
以巡遊九重雖深盡見山川之疆理所尚者形神不拘清
淨爲徒體安以一襲道洽於三無俟時不在於顛倒致美
何傷乎曳婁于時天淨泰階城開外戶應星精以列將動
岳神而生輔楚製者分閩而守封縫掖者坐帷而論古續
未周而如挾袞有闕而咸補德旣昌焉不亦宜然冀出豈
勞於問歷山呼無待於卜年疑旒而惠澤潛布歛衽而皇
風靡前與三五爭步驟微臣亦迷其後先

信及豚魚賦

以聖朝道孚
微隱爲韻

封孟申

皇帝奉天心執人柄自毛羣之賤品及水族之微命咸安
其生各遂其性小旣化矣諒庶物以歸知大亦宜然由一
人之有慶允所謂法中孚以立極體渙汗而施令其信也
符天之不言其德也與道際其聖徒觀其行藏出處安逸
逍遙時乃上米且不爽於春候時乃登俎幸見錄於清朝
何政令之不誠何性命而不保清瀾自適則樂我深泉行
藟不傷則樂我豐草趨時者保去留之性默處者契雍熙
之道懿夫堯之爲理路行皆如此二字一
作乎比易之取象叶義
必同塗物苟在微則豈唯豚爾類苟在隱則何必魚乎可
謂德侔造化道氓虛無無遠不均將由夫大而不可約何幽

未及詎同彼小且未孚穆穆巍巍我后垂衣域已臻於仁
壽信乃及於賤微恣彼噍喁在安流而長逸睹其膚革與
至道而俱肥斯可以見聖皇執物誠理是非奚獨龜龍假
而表瑞麟鳳降而增輝而已哉士有象旣得而言欲忘信
已誠而行庸謹安貞誓於期耄慎獨稟乎齟齬觀光上國
感豚魚之以孚願仕清朝匪巖穴之可隱

王言如絲賦

以有云如絲演
若綸組爲韻

謝觀

君言之重兮發彼加人如絲之細兮出已成綸將植樞機
之本必滋秒忽之因初具體而微降一句之繩準俄觸類
而長入百司而縷陳是知作彼紀綱從而推闡密旨欲布
殊私以展透冕旒以尚細入鈎衡而漸演及爾如貫審知

詞理綿綿搏之則微益見言密蜚蜚且夫謂至密而已著
將未聞而已聞遂意淫繹隨聲糾紛無類而洪纖起散有
條而派脉別分離一庭之間聽皆歷歷出九門之外遠已
云云是故遐邇羈縻上下聯絡毛舉之讚是卹蠶食之誠
詎作詔多事而折藕難比寫綢繆而曳緒不若遇終軍之
一請便吐長纓後龔遂之載言俄陳亂索不同抱布而取
詎等茹柔而吐孜孜下問義同小往大來乾乾若抽事符
以索繼組不可卷也引而伸之不滯異維舟之紉無點殊
墨子之絲與奪而起於分寸傾危而失在毫釐夫如是上
言也不可不可不精下聞也不得不受知駟足之難及保三緘
之可守語不墮而寰宇歸心思無邪而蠻夷稽首可以網

羅八表可以倫貫九有然後緝熙不紊條章有餘自契不言化矣豈假聞斯行諸方知微細之喻也敢願戒慎之所如

舜有羶行賦

以天下歸之如蟻慕肉爲韻

謝觀

肉不愛蟻蟻自來依舜不求人人自來歸爾則以羶生嚮慕我則以思深惻疑作惻微和和子來竟歡懷於德飽佚佚類聚各霑濡以家肥是知取喻於彼欲明於此播薰風於酷烈比黎庶於螻蟻温恭允塞諒不阻於幽肥玄德聲聞固無間於遐邇是故四海分會千門競追共仰來蘇之日誠非逐臭之時以孔甘爲味以潤下爲脂率從其旨爰度迺私應其欲而徇矣思所利而瞰疑作瞰之各竭血誠汝則

如饑如渴無勞肉視吾乃龍章鳳姿載求而羶不在身三嗅而羶不在服在乎安長幼資亭毒行葉揚芳言蘭芬馥以膏腴及萬姓萬姓熙熙以霑澤滂四門四門穆穆咸遂其性各安其族並飲其風順雨調豈止於觴酒豆肉若乃望之如日戴之如天不銷不歇沛然霽然如此乃聞羶者焉如或失之於上迷之於下四罪之徒三苗之野如此乃聞羶之者喻旣斯大義豈憑虛以心求芬芳者得以鼻求芬芳者踈自發德馨之惠寧同乳臭之餘服媚媿之而孰可芬香擬之而豈如由是蒸黎子來蠻夷蟻附八方咸戴其照育九土共臻其道路惠然若歸往也如慕煥重瞳而日月清朗齊七政而恩威布濩至矣哉巍巍堂堂可謂

承天有裕

舜歌南風賦

以能感和樂生
殖羣物為韻

楊迺

巍巍舜德于今人稱居北極而惟大歌南風以敷弘歌之
伊何制絲桐而合奏風之至矣信長育而有徵茲可謂無
為而自理天縱而多能美夫誠發深衷物能應感憫沃瘠
之勞逸均陰陽之舒慘是用作則於世利之孔多風詠凱
兮美萬物之蕃衍樂操琴也佳五聲以同和復而不厭遠
而匪他方將煦嫗之為意豈徒娛樂於斯歌觀其發宮應
徵揚清激濁自南習習同詩人喻彼棘心入夜冷冷異貧
十叩其牛角則知聖人審音以知政化俗而作樂者有矣
夫懿其出乎幽谷應以繁聲若雲龍之潛召同律呂之相

生萬籟動八音清匪鳴條而扇物方靡草而作程是以人
荷時康功歸帝力四氣以之而不撓百穀從茲而蕃殖節
有度守有則始從邇而及遠終自南而徂北爾乃匪徐匪
疾乍過乍聞颯颯輕音疑少女之初至泠泠餘韻謂別鶴
之求羣亦為父母之網極何必聲變而成文是以德冠百
王致成萬物正南面而恭已懋功千載不拂

禹拜昌言賦

以聖人之心聞
善必拜為韻

大禹君臨勤求意深苟一言之入耳必載拜以明心蓋以
勵華夷形古今所以旨酒盈前莫縱彈絲之嚮美詞將貢
俄聞撼王之音豈不以詢彼芻蕘防乎驕逸既可大而可
久亦無固而無必所以嘉謀乍聽當業業以折腰直語纔

聆復度度而屈膝蓋以廣乎所見求其所聞欲使善惡之
源自別賢愚之路斯分况乎傳舜之規受堯之命得不固
社稷根本察風俗利病是以臣不能諫君兮非曰忠君不
能納諫兮非曰聖執至理以垂教採昌言而化人苟有言
可佐王道正人倫陶也不得不進禹也不得不遵所以聞
妙畧以開容拖冕旒而拂地覽宏謨而致敬低珩珮以鏘
身懼溝洫之未通憂禮樂以將壞以正直為龜鏡以忠讜
為規戒是以蘊昌言兮不可不陳聞昌言兮不得不拜遂
使共守丕業上光帝基若魚水相逢之日同雲龍會合之
時符郊時以陳儀固難比矣望竹宮而設禮曷可方之我
皇紹九聖之雄圖舉百王之令典急於求士樂於聞善所

以獻昌言之忠臣必待之台鉉

木從繩賦

以聖君順諫如木從繩為韻

王起

惟山有木惟木從繩繩舒卷而克正木堅貞而有憑杞梓
未分規矩假之以冥立斧斤斯運曲直欺之而不能古人
以政有得失俗有廢興因納諫之善諭為箴闕之明徵當
其懿匠負來瑰材旅進既陳之以糾纏將加之以霜刃掌
握初縈綢繆忽振尋尺曳而愈出分銖筭而底慎則椽之
橐橐既砥平而履端伐之丁丁亦木開而委順則明正不
得不受曲直不得不容如獻替於百度宜啓沃於九重繩
墨之間既無違於目巧君臣之際固宜警其面從然則上
達四聰下延五諫比斯木之猶惑待斯繩而作限廣狹有

準短長無間自然巨川舟楫何虞沉潜之憂大厦棟梁不
貽壓覆之患有條不紊今其功有餘舉直錯枉今可以行
諸旣爰究而爰度亦匪疾而匪徐向若置而不用藏而不
舒我有梓材坎坎之聲奚自我有剗恢恢之刃焉如裏
裏緒抽綿綿繼屬比朱絲之在琴瑟若飛流之界山谷裁
成廟廟之噐剖判陰陽之木自同絃直不爲絲棼匪專美
於成風之匠亦垂訓於背誕之君雖鱗皴異質擁腫多紋
散作輪轅小大之宜不忒鑿爲戶牖毫釐之度斯分所以
喻謇諤於後學昭輔弼於前文方今補袞惟勤和羹克正
契君臣以魚水以繩墨爲龜敬則考殷宗披說命未若賡
歌於元聖

第二

以木以繩直君
由諫明爲韻

張聖之

古之善諫者喻其心如繩直展成規於良木旣折中而經
始必周流而牽復以其性有曲直固從乎彌綸以其材有
短長必由之盈縮故可彰其言兮直如矢喻其諫兮從如
水旣應用而無方且適道而虛已爲楡楠之無繆成棟梁
之有以舉直錯枉且明徑挺之心動而悅隨不矢縱橫之
理觀夫度彼山林直以絲繩旣遵時而有作乃底績而其
凝斷長補短物無失性損上益下道罔不興猶其善而惟
變所適類夫諫而不命其承匪差毫釐存乎楷式在操張
而爲務乃經紀以成德操端有準希匠石以財成枉撓必
從表王道之王直况夫準以綸綍順乎節文不循枉以爲

利必適道而斯分假物而言故引從繩之木樂諫爲喻明乎則聖之君原其納誨之謀觀其所由旣規矩而有制豈文理而是求糾纏旣施足彰妙道之用衆材方正比夫從諫如流且夫獻直言者必有備無患木從繩者叶執藝而諫故得明乎官以相規人之無訕矧其不枉道以求用恒守道以爲名匡乎不正使其正規其不平使其平使一作王或此所謂不可欺於繩墨乃得配乎權衡恭惟賦於說命知諫道之克明

王者父事天兄事日賦

以國家悌理度誠墨失爲韻

浩虛舟

二儀覆載德之廣者唯天三光照臨明之大者唯日故王者於天也父事無怠於日也弟恭靡失布和施令將成不

宰之功明目達聰欲一丘無私之質當其萬邦作貢四海爲家仰元氣而晨昏靡懈指陽精而伯仲非賒草色難窮屢軫南陔之戀棠陰易匪常思棣萼之華所以化洽中原祥臻上國法寒暑觀從政之道無薄蝕見相容之德登封泰岳猶疑陟岵之時展禮東郊似望在原之力愛敬無斃恭盡虔窺一氣異歷山之江攀六龍爲荀氏之賢覆燾成功且異靡瞻之義古今垂名豈難窮以長之年且夫致敬唯精傾心仰止誰嬰同席之亂誰効攘羊之旨曾聞有關遠懷幾疑作譏諫之心每懼明窗有遠遊之理所以惟法前哲規後嗣播洪猷恢至美教天下之爲人子者矣又若卑已謙恭端心愷悌同明無終鮮之歎可愛有旣和之體桑榆未

及魯衛之道咸興葵藿皆傾管蔡之讎不啓所謂扶枝葉
固根蒂播仁風匡大禮教天下之爲人弟者矣範人倫者
莫先於元首遵孝理者在致乎精誠必有尊也天其父必
有先也日其兄九服洽和若嗣高於廣大萬機洞照契承
照於貞明故得孝道日彰休聲風靡指圓蓋兮欽若仰紅
輪兮翼爾由是海內無賊子姦臣吾君如此

文苑英華卷第四十三

文苑英華卷第四十四

賦四十四

京都一

西都賦一首

東都賦一首

西都賦 并表

李庚

臣伏見漢諸儒若班固張衡者皆賦都邑盛稱漢隆當王
道升平火德丕赫數子歌詠發著後代今自隋室遷都而
我宅焉廣狹榮陋與漢殊狀言時則有六姓千齡之變言
地則非秦基周室之故宜乎稱漢於彼述我於此臣幸生
聖時天下休樂雖未及固衡之位敢效臯陶奚斯庶幾之
誠謹冒死再拜獻兩都賦凡若干言以誦夸漢者昭聞我

十四聖之制度請付史氏賦曰洛汭先生客于上京問里
人以秦漢咸陽故事里人曰先生不習乎哉秦址薪矣漢
址蕪矣西去一舍鞠爲墟矣代遠而移作新都矣先生曰
賓者不識藐然老沉惜歲亡而日遠願聞古而知今爲我
源說恭承王音里人曰昔者帝兆唐居命隋先基乃假隋
權是開中原旣權二年爲唐遷都周榛秦莽平無耕餘文
驅煬迎卒于侑傳若天使項氏死勞而授漢休也唐開禪
壇新都之門闕殿乾宮以朝諸侯時則有若房魏作弼英
鄂執律南陽故人河間帝室戎衣旣脫瑞氣洋溢謹聲傳
於億兆煬燎致乎太一乃會漢酺發周賚謚萬類凜四海
遂開國以報功差子男之五等然後構閣圖形榮號凌煙

指河帶以山礪書天子之縉紳其制度也擁乾休正坤儀
平兩耀據北辰斥咸陽而會龍首右社稷而左宗廟宣達
周衢址以十二棊張府寺局以百吏環以文昌二十四署
六部提統按星分度儼憲臺而西列肅陰館一作宮於北戶
建倍負於前王忽維綱於御史端國

朝儀

一作儀

實周察乎左右其內則有太極承端通址含元

日出東榮月沉西軒倚九峻之下麓涵太液之清瀾龍道
雙迴鳳門五開煙籠凝碧風靜蓬萊東則左閣一作閣當辰

延英耽耽宣徽洞達温室隅南接以重離絲乎少陽是爲
二宮複道邃廊西則月華重啓銀臺內向中書在焉密用
宰相宦者別省延緣右藏建子亭於屏外設蘭綺於廡下

天子端朝明庭九賓發少府之冕旒陳奉常之書一作官勲

肅勾陳以辟護翼雉扇而對分鷄人乃下鶴唱先聞千官

就日萬品趨雲漏遲遲而東轉風習習而南薰外則國子

招徒疏館開軒左立太學前博廣文膳豐中厨就教九年

稽以博士總之成均祕書典籍品命拔郎橫閣三重闡正

鉛黃若六藝之條貫百氏之縱橫交錯發論禮形而樂聲

太傅在前少傅在後載言載筆出納謨誥鵷動鸞飛振玉

鎗金殷廟羞瑚璉之噐楚材漸祀梓之林已而燮和陰陽

經緯天地採摭軒昊牢籠虞夏闢孔子之學堂敷一代之

風雅此王者之文教也親兵百萬制以神策紫身豹首金

腰火額獵霞張旆剥犀綴革奮目而虎眦振髯而蝟磔柔

六鈎貫七札對天仗以司戈分玉墀而執戟別有陳旌賜

旂一作鉞闔外四七依榆關以作鎮拒柳營而開壁逐虜則

出塞飛塵伐叛則救陽作澤此王者之武威也唐禮既行

三代同風徵叔孫之春官命伯夷之秩宗則有封禪巡狩

謁天拜祖明堂辟雍王者之事有司勿失次有朝廷之位

班爵之序器服車馬以節文武不僭不濫群臣之事有司

以告下有內族外姻以殺以隆五禮各殊陳吉儀凶一室

是形天下大同百姓之事有司以教故以內則敬以外則

嚴以家則肥以國則昌卿士翼翼公侯皇皇在野熙熙在

朝蹠蹠夫如是夸周而正魯胡可殫詳泊乎樂之設也以

德配樂陳噐以作革木匏竹篥簾磬罇罍命官二署諧以協

律以奏廟貌祖考來格以陳宮庭簫韶九成鳳皇來儀以
布天下手之舞之足之蹈之及乎御胤衣集舞童或獻凱
作名以宣帝功或布字綴行以達皇風此禮經之所未紀
夔曼之所不同刑期無刑辟以止辟三章寘漢祖之德肆
赦緩穆王之法於是天子御端門詔天下渙汗發澤與民
更始建金鷄於伏內聳脩竿而揭起其下則稅三關解銀
鐺見說文追共工徒驩堯燹舜絃浹堯年臺收白簡史閣冊
筆摠秩官之計料不踰乎三十斥匡衡之失論罪溫舒之
不足司刑無鬼哭之庭大理有烏巢之獄又若薦祖建宮
玄元之庭霞帔雲冠飄飄太清天子將有事也歲且時邊
夏簋殷劔傳金爐之御烟開甲帳之琳琅此王者之示孝

也對里連街帝宅王家青門列檻棠棣分華勤政外名花

萼中題屹雲中而佩鳳杳天外而舒蜺於是天子設千席

羞百醴家人齒筵愉愉濟濟此王者之示悌也盛則長隄

砥平錯則纓弁繁一作煩夥佩印分魚九參六佐肅威儀於

行蓋指戒途於前馬待漏未開朝騎杏街鷄鳴朱邸火度

青槐先導擘雲後車奮雷逸一作巨以嚴聲不生微埃人寒

物慄統以京尹臨人秉殺罔敢不謹豪家戚里金張許史

走騎如龍行車若一作如水拉枯請命曾不仰視配前秦與

後趙大粹作前尹前有趙張後有王似謂京三王但疑倒用固異代而殊擬其地勢

也負秦章臺倚漢甘泉帶涇渭之富流挾終南之壽山指

重城於二華度外門於兩關玄素交川灞澹在焉斷虹偃

蹇而巨梁拖輪走驟而蹄奔度萬國以向朝趨魏闕之通
一作東門赤縣統劇停阡帝鄉長安萬年乾封明堂藍田左
掎鄆杜前張分圻連乎馮翊晝郊接乎岐陽排吳山而抵
巨蜀氏谷而通商天子穆清環衛陳兵將軍之號三番六
營至乃辨曉警昏主在金吾鼓列六條外傳通衢備以嚴
兵羅以周廬禁動息人用戒不虞其中則御水分溝昆明
下流在野决溉入宮環洲菰織蒲紉芡贊菱羞渚戲玄鷁
沙眠白驅其遠也深有蛟潭派作龍湫浹接河漢波通女
牛其近也方塘含春曲沼澄秋戶閉烟浦家藏畫舟爾乃
農家東作厥土黃壤樹以桑柘翳蒼乎南畝以秔以稌以
稷以黍以輸太倉天子之儲土厚地中溫寒以宜門多杖

老室有蕃兒承化發謠帝力不知則有程鄭之家白闥朱

軒

一作白馬朱駢

崇基峻砌待四高門

一作待木秀茸葩紅舒綠

繁挺碩果於華林育豐蔬於中園珠泊晝晴金缸夜明羅

繡巾憐鼓瑟吹笙譁族陳賓以樂乎太平貨隧分塵物次

駢連中署肆師夕咽朝昏越璞楚琛蜀賄巴寶裁綺張繡

紋軸蕉筒聲教之所被車書之所通交錯雜沓斯馬會同

黃宅鎔廬金篆玉扃以張帝居用壯天庭千形萬聲不可

多名天子奉堯舜之道勤后稷之功當仲夏而獻繭立中

和而視農然後黼黻時備粢盛告豐其接下情也則堯鼓

不懸晉木不列鎔金作軌四門是揭人靡迷邦士無諱訐

示收才而問肯上諫行而寃達當其萬國貢珍四夷納賚

賦用舟通財因輦進地官計國度支主吝百姓既足斯焉
克物復若天府萬品以備供職登饌則光祿獻厨命駕則
太僕承軾其樂人也大啓九門一作重分開三殿齒群臣一作官
作於次坐徵公族於內宴于以訓恭儉于以示慈惠戲族
咸在百弄迭改視仙童之霓裳覩壯夫之角觝御階晝陰
帝坐春深續紛官闈窈窕嬪林既受賜於逮昏盡拜帛而
懷金與衆之樂一日於此先生獨不習乎其四郊也或有
乘時之舊址亡國之遺蹤天子迎四氣盡然改容曰是足
以懷傷於耳目作戒於心曾昔秦政肆刑秦民共傾楚澤
大呼分隳列城徒罷驪山役休上林秦址既遷鴻門至今
此東郊之事也隋苑廣袤置籠南山占地萬頃不爲人間

齊門失耕禽游獸閑代謝物移繚垣不完北南郊之事也

豐水悠悠文王作周傳艱子孫衰平遂遷乃睠鎬都武王

宅居國失赧遜

一作死

豐鎬皆蕪此西郊之事也漢設五疇

以主淫祀樂誑徐誣將求永乂天子親拜太牢黍牡事亡
地存爲天下笑此北郊之事也故因迎春則鑒秦敗知恃
刑不如恃德也因迎夏則鑒隋怠知獵獸不如獵覽也因
迎秋則鑒周勤知祖基作艱傳萬年也因迎冬則鑒漢誤
知去淫即正獲天祚也四鑒以陳澤于生人四德以懋格
于上下故我高祖一呼大定安都居正傳今皇帝一十四
聖是知禪國也禪都也非得隋之命是得天之命

東都賦

前人

先生曰富哉言乎堯舜之事吾知之矣然天地旁魄與區
 不一九衢六陌亦稱河洛始乎周卜今自隋革進八百里
 作唐東宅成者居者一作功成者居余得其故用悉聞見丕我王
 度子不識乎顛煬奮華中原毒痛順天應人文皇赫圖王
 克不來建得相依阻我東人不蘇義旗高祖西安文皇舞
 干一挂戎衣邦一作我人保完彭城獻級東功乃立則創業
 之事不獨于西也至天后三字一作高祖朝匪伊是居於
 焉逍遙明帝大同出震開宮恩波爾鄉洩源于東則太平
 之事不獨于鎬也若乃用一作周洛為池帶河一作漕為沼洞
 八門之會要控二梁之夭矯在隋之始一有移字劃前規之隘
 後舊制之陋指半舍而薪布乃集工而成就重城不居萬

盜齊構訖大業於義寧廓皇家而遜授既而天踵以正地
 產以實禎符所記一作禎祥以記嘉名不一表賢則河水變清瑞
 聖則洛圖屢出帝功既成封禪禮行顯祖光宗勒岱而祈
 嵩我甸我郊三聖之靈壇在焉赤縣神州與京比儔逕東
 山之貢賦扼關外之諸侯直齊梁而駕輅引淮汴而通舟
 太行枕甸發址崇垓覃懷鎮封上千昭回鑿門導伊兩阜
 屏開育仁願智堂奧一作隅庭隈爾其左掖通東右掖洞西
 籠故地之銅駝抱舊里之王雞御溝接派苑樹通提抗鳳
 樓於內庭蠹端門於天街上陽別宮丹粉多狀鴛瓦鱗翠
 虹梁疊壯橫延百堵高量十丈出地標圖臨流寫障霄倚
 霞連屹屹言言翼太和而聳觀側賓曜而疏軒若蓬萊之

真侶瀛洲之列仙鸞駕鶴車往來于中天巖城曉啓千門
萬戶建衛對營開扃接牖翠華在鎬分官以守監署惟三
卿曹亦九臺閣高閱支馭一作友叙東方仍一作乃俾二官別持
憲綱赫若夏日凜如秋霜威動乎甌閩之國風行乎燕薊
之鄉郊圻作固兵屯一作屯兵孟津千里無烟萬夫信信實兼
武牢以食濟温唯是咽喉屬于將軍禮樂所流厥惟舊周
追魯俗而爲隣化殷頑而作柔異材挺擢多士優游原膺
膺而耕溺水濺濺而洗由士得天爵孝稱行原身行大節
里有旌門以繼前脩以垂後昆榮一時之史籍聳當代之
人倫兄友弟恭位皆崇榮石記標衢棗萼爲名螭首龜趺
疑峙雙形指兩馮而遠邁對二陸而遐征至若里巷之新

各問閭之近革

二字一作舊識

或區區於傳說或瑣瑣於典冊非

儆戒於將來何侈言之敢作且二誥尚存始卜惟艱四姓
所都季年乃遷或得于聞或得于傳幸子勿譁試爲子發
乎齒牙里人曰諾先生曰邾邾之地中居帝域賢相聖營
龜符墨食成王定鼎以休姬德三十承孫八百祚年祖功
寢微衰平乃遷幽用婦烽諸侯疾怨夷元敬朔太史不頒
百派分波爭涸其源汜水而鄭陽翟而韓晉盟河陽秦戍
新安一旅之兵一同一作雷之土嬴氏乘之不享文武此周
之失都也南陽真人復運漢基舊邦惟新上稱康時光武
而釀明醴和醅冲質不長栢靈自縱后咸立權內官分弄
四星耀斗百槐摧棟陽弱陰疆劉輕曹重此後漢之失都

也魏不徒許促齡四十疆臣執柄三嗣徒立政由審氏王
髦莫奮丸解土崩炎居與遜此魏之失都也晉始三世亂
興永嘉蕭牆構兵沉闕稱戈浩浩逆流天下墊波八王既
分五馬南奔左衽之裘乃來中原此西晉之失都也故權
在諸侯則姬氏平權在內官則漢室傾權在疆臣則魏徂
權在親戚則晉走是四者各以其故權與勢移運隨鼎去
從古如斯謂之何如世治則都世亂則墟時清則優偃政
幣則戚居勿謂徃代試言前載開元太平海波不驚乃駕
神都東人誇榮時則麟麟其車殷殷其徒行者不賫衣食
委衢冠冕之夫綺羅之婦百室連歌千筵接舞高樓大觀
陳賓宴侶金堂玉戶絲哇一作管語我道如堯我稅如貉

貧庾而稻賤筍如

一作

楊比屋相視耻衣空帛開場分肆

不列蕤麥同軌同文晝呼夜謹父懌子愉去經

一作而盤

既兆既億動動植植無聲之樂薰然不息稽成康之周隆

考文景之漢休權代繫時不為彼優我俗既饒我人既驕

安不思危逸而妄勞故天寶之季漁陽兵起逆旗南指我

無堅壘匝旬輦動衝天羯腥門開麗景殿擡武成殺人如

刈焚廬若薙蜀駕先移胤師後誓傷四年之委燼會二將

以建勳天落妖彗風摧陣雲及夫掃臺榭之灰收京野之

骨徵郡國之版在驗地官之籍列太平之人已十無七八

至德復興六紀于茲七聖儲休平癰補疾故含識之士女

植髮之童兒皆能痛其喪亂而期我康時今四方之事叟

不知也惟洛泱泱瀆盈萬室惟城職職市鄠駢集比年大有稍藏以實都人嬉駕有笑無慄咸曰將睹乎貞觀之風開元之日鄉里之人思萬乘之威儀幸物阜而時和指康衢而引領作望幸之賡歌歌曰曉雲行兮西風慶搖裔兮龍在中望雲光兮拜千百西澤霈兮均東澤里人曰誠哉是言前年日南至天子謁太清一有宮字太廟郊天祀地既畢事執謙端珽謂公卿大夫曰予在人上歷祀三四年穀比登未極于富人庶稍蕃未臻于壽動植小遂猶有枯天日月所至猶照叛土戎狄雖貢西地猶虜今行大禮得不媿望于天而獻羞于祖是尚以聖政爲憂未意於行幸也先生曰大哉爲君用是言也理是事也則千里如郊萬里如也

凡一作皆文粹

圻在西而東均處內而外肥吾歸息鄉里之謠安堯舜之時將齊驅於壽域何近喜而遠悲則知鑒四姓之覆轍嗣重葉之休烈用是言也理是事也即所都者在東在酉可

文苑英華卷第四十四

文苑英華卷第四十五

賦四十五

邑居一

登長城賦一首

雲中古城賦二首

北斗城賦一首

新築峨和城賦一首

華山爲城賦一首

函谷關賦一首

潼關賦一首

武關賦一首

登長城賦

徐彥伯

班孟堅輟編史閣掌記戎幕坐燕阜之陽覽秦城之作喟然而嘆曰傳翼下鞬視人則媮鯨吞我寶鼎蠶食我諸侯鞭撻我上國動搖我中州所以二世而殞職此之由乎當其席卷之初攻必勝戰必克因利乘便追亡逐北自以爲

功勤三王威懾萬國重鉄鑕干戈於仁義輕詩書禮樂於
殘賦然後馳海若以爲梁斷陽紆以爲藪犀象有形而採
掇珠玉無脛而奔走朝則貪堅墨比肩野則廢人鉗口負
關河千里之壯言帝王一家之有神告籙圖亡秦者胡實
情蕭牆之嬖濫行高闕之誅鑿臨洮之西徼穿負海之東
隅猛將虎視焉存一作此馬綱紀謫威勃興鈞繩亂起連連塢
壁岌岌亭壘飛芻而輓粟者十有二年塹山而堙谷者三
千餘里黔首之死亡無日白骨之悲哀不已猶欲張伯翳
之絕胤馳棠梨疑作之驕子曾不知失全者易傾逆用者
無成陳涉以間左奔亡之師項梁以全吳趨悍之兵夢騫
徵其敗德斬蛇驗其鴻名板築未艾君臣顛沛六郡沙漠

五原旌旆運歷金火地分中外因霍主之淫慢成後王之
要害則知作之者勞而居之者泰歲次單闕我行窮髮眇
嘿雞田幽陰馬窟土色紫而關迴川氣黃而塞沒調噪鼓
於海風咽愁笳於隴月試危坐以側聽孰不銷魂而斷骨
哉况復日入青波堅冰峩峩危蓬殞蒂森木靜柯群峰雪
滿聯峴霜多龍北臥而銜燭鴈南飛以度河載馳載驟彼
亭之候唯見玄洲無春陰壑罷晝鷲隼爭擊哀徠直透饑
鹿夜咆乳虎晨鬪蟄熊舐掌寒龜縮殼悲壯圖之天遏憫
勞生之艱遘昔者韓信猜叛李陵拘執望極燕臺山橫馬
邑戰雲愁聚衝颺晦急莫不陵地脉以扣心望天街以殞
泣亦有王昭直送蔡琰未還路盡南國亭臨北蠻貯漢月

於衣袞衰胡霜於髻髮雖寵盈氈幄而蒐斷蕭關至若趙
王遷逐馬融幽放去家離土踰沙歷障夢蠨蛸之戶側坐
蠨蛸之塞上桃李夕今有所思綺羅春兮遙相望登毀垣
以擗標坐頽隅以惆悵是以衛青開幕張遼闢土校尉嫖
姚將軍捕虜雍垣鋪障鋤亭伐鼓斬元於鐵防之門流血
於金河之浦張虎牙以泄憤虬蝟鬚以蓄怒及夫中郎殉
節博望踰邊取劔仆地尋河際天幽海上而萬里竄胡中
而幾年銀車荐出玉節仍旋南向國以樂只北違沙以莞
然嗚呼長城之設載逾九百古往今來巋然陳迹窮海戰
士孤亭戍客登峻墉陟一作窮石嗟故里而不見感殊方
以殞魄者亦何可勝道哉嗟我羈淪南庭苦辛心一作懷

壯士未慕忠臣經百戰之戎俗對三邊之鬼隣徐樂則燕
北書生開偉詞而諭漢賈誼則洛陽才子飛雄論以過秦
歲崢嶸而將暮實慷慨於窮塵

雲中古城賦

呂令問

正北曰弁有唐作京密近戎狄張皇甲兵尹也總居守之
任將也當節制之名故卒乘輯睦而王都肅清於是斷武
誼按亭燧電轉前旌風吹橫笛楊葉箭的蓮花劔騎下代
郡而出鴈門抵平城而入胡地挾纒稱暖投醪必醉則知
撫之者誠難用之者不易是時陰閉群山寒凋衆水川平
塞迴冰飲霜宿慷慨乎大荒倘佯乎遊目區脫潛遁屠耆
攝逐訴古城之謂何傳魏家之所築伊昔晉京版蕩海縣

沸騰不有所命將何以興王師赫怒爰整其旅霧集雲屯
龍驤鳳舉棄萬里之沙漠傍五原之風土肇爲此都寔惟
太祖夫其規典章辨封疆池桑乾之水苑秦城之牆百堵
齊矗九衢相望歌臺舞榭月殿雲堂開儒士於壁沼貯美
人於玉房翕習沸涓熒熒煌煌取威定霸於是乎在施令
作法罔或不臧武破六州之內文宅三川之陽何其壯也
旣而年代倏忽市朝遷徙干戈輦鼓之雄綺羅絲竹之美
孰不煙散雨絕沙埋灰委樹名歡而詎存鳥稱樂而俱死
危堞旣覆高墉復夷廖落殘徑依俛舊墀榛棘蔓而未合
苔蘚分疑乎相滋伏熊鬪鬪騰麝聚麝常鳴悍驚乍嘯愁
鷗不可勝紀但令人悲胡風起兮馬嘶急漢月生兮鴈飛

入可憐久戍人懷歸空佇立有客志遠才雄秉義由衷負
詩書禮樂之用蘊蕭曹魏邴之風虜庭高枕河源鑿空霜
犯鬢而先白塵染顏而少紅三爲都護五掌元戎益封而
廣國事利而業崇獨見凌雲而作賦誰言坐樹而論功者
哉

第二

張嵩

開元十有四年冬孟月張子出王塞秉金鉞撫循邊心窺
按窮髮走汗漫之廣漠陟崢嶸之高關徒觀其風馬哀鳴
霜鴻苦聲塵昏白日雲繞丹旌虜障萬里戍沙四平乘蒙
恬之古築得拓跋之遺城伊昔晉人失政亡彼金鏡海水
朝飛機槍夕映鵝呈而二京繼覆馬渡而五胡交盛慨逐

鹿而爭雄空瞻烏而莫定於是魏祖發大號鼓洪爐天授
宏略神輸秘圖北清蕙儉南振荆吳繇是一太陰以建極
則廣莫而論都遂徵板幹庀徒卒鏟嶢嶢一作削
因方山以列樹按長城以爲窟既雲和而星繁亦丘連而
岳突月觀霞閣左社右鄜玄沼泓泐湧其後白樓巖嶼與
其前開士子之詞館列先王之籍田靈臺山立壁水池圓
雙闕萬仞九衢四達羽旄林森堂殿膠葛當其士馬精疆
都畿浩穰始摧燕而滅夏終服宋而平梁故能出入百祀
聯延七主擊魯衛之諸侯廓秦齊之土宇禮興樂盛脩文
輝武講六代之憲章布三陽之風雨亦云已矣哉俄而高
祖受命崇儒重才南巡主疑鼎之邑北去軒轅之臺鵬搏

海運鳳舉天迴嗤紇真之鳥死憶新野之花開自朝河洛
地空沙漠代祀推移風雲蕭索温室樹古瀛洲水涸城未
哭而先崩梁無歌而自落魏家美人聞姓元新聲巧妙今
古傳昔日流音遍華夏可憐埋骨委山樊城闕摧殘猶可
惜荒郊處處生荆棘寒飈動地胡馬嘶若個征夫不沾臆
人生榮耀當及時白髮須臾亂如絲君不見魏都行樂處
只今空有野風吹乃載歌曰雲中古城鬱嵯峨塞上行吟
麥秀歌感時傷古今如此報主懷恩柰老何

北斗城賦

以池塘生
春草爲韻

崔損

開元七年登
科記作崔鎮

昔炎漢之開國宅咸秦而設規闡都邑之壯麗紛制作而
多儀像蓬島以䟽岳擬天河而鑿池館倚南山擡雲霞而

上出城作北斗仰星漢而會披何爽鳩之代謝驗驪驪之
運虧是以作之者不處居之者不為祚我神唐丹青焜煌
峻址雲矗曾譙錦章慕蘋壤以壘形凝皓粉以飛光門結
黃金之石檐施白壁之墻堞盤紆於曲檻池徑復於圓塘
城勢逶迤若台岑之隱映樓形宛轉似崑崙之相望接千
門之宮闕通八達之康莊既而鸞駕西巡嚴扃晨啓羽衛
咸集聲明克陳登睥睨以清夜聽畢逋而候春儼雄戟以
耀武振鷓行而拱辰夕沉煙雲之色曉流車馬之塵引祥
昭之爛漫吐佳氣而輪困於是歲發青道池隍煦旱堞霧
縈林岸風柔草暖懸竇以彌藹飾崇隅之增好映春水之
澄澄納朝陽之杲杲惟壯勢之崢嶸達洪規而鎮京望浮
雲之黑水對翔鳳之丹楹配宗子之永固等皇家之不傾
俯賓庭而贊義終自惡其輕生

新築峨和城賦

以遠夷歸化邊
候肅清為韻

陳諷

元侯以制敵之雄略期方隅之永清得奔衝之故地剏備

守之新城四合分形見岡巒之表裏百堵定制變勝負之

虛盈崒雲屯而霞起忽虎踞而龍行倚蒼壁以中絕玷第

十七卷長春 頽壤而外明將伐謀伐力制敵投兵馭亭嶂

於振策推兵羌於矯衡是知地利攸歸兵家大福我有巨

防師無遺鏃神謀洞啓而機張天險載興而板築于以巒

披岡削嶺門崖谷此兩句一作披岡 雉堞霜皜麗譙雲矗

連山上捧鬪士以之增威峭壁初嚴戎王於焉慟哭矧夫

勢雄形固師嚴令肅數萬落於屈指睇連營於寸目何費
費於經營求無虞於敗覆故能功圖穀內智出謀先高厚
不愆乎一作于上命規模必合於中權俾夫登陴荷戟憑墉
控弦虜魄暗禡漢烽不然仰峻隅而已憤望懸門而不前
懼摧鋒於百勝敢踏伏於三邊者哉是知奇功不作俾殊
俗而向化善守以威即死士而知歸不然者戎輕無常獸
困猶鬪安能使犬羊掃跡烽柝寢候仰新壘以投戈覆故
巢而罷寇是知威服德綏不獨遠夷彼或不讐我則成城
以耀武彼能懷惠我則蹈道以貞師庶肩鏞而惟求顧咽
喉而在茲彼周城朔方漢得赤坂無制勝之明術徒疲人
以勤遠豈比夫脩武備清文苑將鳳沼以酬勲佇靈臺之

伯偃

華山爲城賦

以因形設險申德所爲韻

地控強秦路惟分陝有太華之作固若崇墉之生險絕壑
中抱重巒外掩倚雲漢而匝野屏開跨金方而當空黛染
千尋壁立萬雉雲屯龍盤日月虎視乾坤大河自北而東
呀爲濬洫窮谷從中而斷豁若重門誠百二之光宅見九
五之天尊偉夫襟帶皇都咽喉上國磅礴乎崑函之外隱
軫乎豐鎬之側所以羅群象吞八極展萬祀而成在衆心
冠三秦而位居一德况乎天地初霽雲霞四披紅塵滅影
碧落標奇宿霧市之氣尚疑煙闕聳蓮峰之色不讓文碑
顧萬夫之莫向信六國而奚爲岌岌神才言言天設連岸

抱九州之路壯氣折諸侯之節蕭蕭歸馬想飲窟之初還
隱隱輕雷訝鳴鼓之不歇天包地束鳥過雲輕萬仞垂峭
千峰入冥髣髴虹蜺盡識旗旌之色依稀星月皆分孤矢
之形疑其發跡混茫孕茲重阻假巨靈拔山之力衛王者
登龍之所不然安得不費一錢不勤一旅削戍而千里共
峻作鎮而一人可禦是宜堯爲君而舜爲臣道爲主而德
爲隣與天地之人共守使海內之士咸賓夫如是則東夷
之與北狄雖欲窺而何因

函谷關賦

閻伯璵

函谷天險弘農邦鎮南據二虢北荒三晉洞開一軌壁立
千仞逕薦雙合梯苔孤峻世濁先封道康後順遠秦塞近

嶠陵幽泉

或作遂

脉脉斷峰稜稜增啤霧杳聚拆煙疑高卑

異級坻岬相承靡屈靡究不騫不崩實隄防之樞轄爲造
化之緘滕齊之以權衡危不可得約之以符璽信而有徵
昏主既廢聖人以典慎終於始欲罷不能觀夫憧憧往來
驂駐戍霧據于石東西十里臨其深前後咫尺建瓴百二
之國扼喉三七之路幅員旣長城小而固恃玄化之陰隲
望彝倫之攸序於是敕用傳禁棄縉商君本魏之公子柱
史乃周之臣符知結草之可守故習坎以無虞原夫阻河
稱深因山爲衛背宇宙之衝連阡陌之勢萬方納款百工
獻藝四旁礫攘諸侯之政典一丸成功陪臣之邪說直指
天符變穉夷之末橫分地維弛旂旒之贅聿脩綱紀以遏

醜戾或懸門而不發殊勇夫之重閑懷德維寧將鎮其細
既皇漢之辟國寔扁鑄於新安固之胡易捨之則難復襟
帶於故道徒頽壤而未乾善孟子之禁暴惡臧孫之謬官
存古訓以是式庶斯文之不刊

潼關賦

張翌

惟皇王之建國分中外於上京憑山河以作固闕夷狄而
騰聲誠曰咽喉吞八荒而則大是稱巖險控萬國以來平
周有掌貨之節禮無關門之征巨防宵扃倚洪波而作鎮
重扉擊拆連太華而爲城紉中代之新號變函谷之舊名
柱史老聃擁仙雲而西邁終軍童子建使節而東行文仲
不仁廢六關而興請王元有說封一丸而求清若用備不

虞取諸繫象作邦畿之襟帶杜奸宄之來往長墉矗兮雲
屯曾樓赫以霞敞登臨者有知其地雄踰越者無漏於天
網亦有孟嘗奔走長宵未曙何白馬之不談學雞鳴而乃
去逢尉臣之一失或愚者之千慮至如楚漢爭雄沛公先
入旗鼓照耀兵戈翕習南面則三傑齊驅東井則五星俱
集寔靈命之所應亦人謀而是及王道廓而已清帝業巍
乎乃立窮四塞之艱阻成百王之都邑故知建功定霸期
乎此關武侯矜於固險婁敬說乎河山視前列之軌躅覽
陳跡而躋攀既登高而能賦希駟馬而言還

武關賦

以海內無事重
關不脩爲韻

王恪

路入商山中橫武關呀重門於固護屹峭壁以孱顏昔在

危時屯千夫而莫守今當聖日置一卒以常閑觀乎地勢
爭雄山形五對西連蜀漢之險北接崤函之塞鏖百二都
綿幾千載世亂則阨限區宇時清則通流外內當其六國
連謀關防日脩則斯地也雲屯貔武雪耀戈矛張儀出以
行詐懷王入而竟留縱下客之鷄鳴將開莫可任公孫之
馬白欲度無由及乎塵起九州波搖四海秦鹿失而襟帶
難保漢龍興而山河邊改豈料禦衝之所此日全平未知
擊柝之徒當時安在所謂以兵而備者莫之能守以道而
居者莫得而踰千里之金城湯池終爲漢有二世之土崩
魚爛自是秦無今則要害何虞平隆已久雖設險以猶在
顧戒嚴而則不蕭條古壘豈藏文之廢來寂寞空扉似楊

僕之移後蓋以文修武偃國泰時雍濬四溟而作塹廓八
極以爲墉遂使鞶鼓無喧一水之寒聲泱泱旌旗常卷一作
偃千載之暮色重重嗟呼昔爲洪樞今成隙地信無外以
斯見寔善閑之攸致儒有經其所感其事乃曰今朝西去
豈無隨老氏之人他日東還誰是識終童之吏

